



PROJEKAT PODRŠKA GRAĐANIMA U BORBI PROTIV KORUPCIJE

NEWSLETTER ZA I KVARTAL 2023.



USAID
 OD AMERIČKOG NARODA



CCI
 CENTRI CIVILNIH AKTIVISTA
 U BOSNI I HERCEGOVINI



**TRANSPARENCY
 INTERNATIONAL**
 BOSNA I HERCEGOVINA



CRM



Opis projekta

Projekat „Podrška građanima u borbi protiv korupcije (ACFC)“ provode Centri civilnih inicijativa (CCI), kao glavni implementator, te Transparency International BiH (TIBiH) i Centar za razvoj medija i analize (CRMA) kao partneri na projektu, a podržan je od strane Američke agencije za međunarodni razvoj (USAID). Projekat se implementira u periodu septembar 2019 – septembar 2024. godine.

Cilj projekta ACFC je povećati učešće građana u borbi protiv korupcije, te su sve projektne aktivnosti dizajnirane i osmišljene na način da potiču snažan i održiv antikorupcijski aktivizam u cijeloj zemlji i na svim nivoima. Projekat ACFC ima za svrhu da civilno društvo bude reprezentativno i kredibilno u borbi protiv korupcije.

U okviru projekta realizuju se sljedeće aktivnosti:

- Monitoring i zagovaranje antikorupcijskih legislativa u sljedećim oblastima: sukob interesa, zaštita zviždača, javne nabavke i zloupotreba javnih sredstava u izbornim kampanjama;
- Uključivanje građana i izgradnja kulture koja odbacuje korupciju
- Koordinacija i izgradnja kapaciteta uključenih organizacija



Korupcija nije problem pojedinca!!!

Grupa ste građana koja se suočava sa korupcijom u vašoj zajednici i zbog toga ne možete da ostvarite pravo koje pripada vama ili širem krugu ljudi?

Trpите posljedice loših odluka donesenih usljed zloupotrebe položaja ovlaštenih lica ili nezakonitog postupanja vlasti?


Kontaktirajte nas u cilju dobijanja podrške vašim inicijativama u borbi protiv korupcije

063 396 536

protivkorupcije@ccibh.org



Antikoruptivni aktivizam širom Bosne i Hercegovine



Kontaktirajte ih putem njihovih FB stranica!

Više na portalu antikorupcija.info

- Banja Luka**
 - UG "Restart Srpska
 - Unija udruženja poslodavaca Republike Srpske"
 - Udruženje „Misli dobro“
 - UG "Put pravde"
 - Centar za edukaciju "Pro Educa"
 - NGG "Protiv kamenoloma Planina u naselju Karanovac"
 - Udruženje „Perpetuum Mobile - Institut za razvoj mladih i zajednice“
- Bijeljina**
 - Helsinški odbor za ljudska prava
 - NGG "Zaustavimo nelegalnu eksploataciju šljunka u Bijeljini"
- Bjelašnica**
 - NGG „Za zaustavljanje nelegalne gradnje na Bjelašnici i Igmanu“
- Brčko**
 - NGG "Za transparentno finansiranje neprofitnih organizacija iz budžeta Brčko distrikta"
 - NGG "Za priznate diplome od akreditovanih visokoskolskih ustanova u Brčko distriktu BiH"
 - Omladinski centar Vermont
 - UG „Demos“
- Breza**
 - NGG „Za uklanjanje nelegalne deponije u naselju Nedići, Breza“
- Bugojno**
 - NGG „Poriče“
- Bužim**
 - Udruženje distrofičara Bužim
- Doboj**
 - NGG "Za legalnu eksploataciju minerala iz korita rijeke Bosne"
 - NGG "Licencirane i akreditovane visokoškolske ustanove - validne i priznate diplome"
 - NGG „Uklonite Heksan iz Kotorskog“, Centar za humanu politiku
 - UG "Tolerancijom protiv različitosti (ToPeer)"
- Drvar**
 - NGG "Drvar bez nelegalnog otpada"
- Foča**
 - NGG "Sačuvajmo rijeke Foče"
- Goražde**
 - NGG "Spasimo Drinu"
 - NGG „Goražde bez pesticida“
- Istočno Sarajevo**
 - NGG "Stop izgradnji mHE na Kasindolskoj rijeci"
 - "Ženski interaktivni ruralni centar" (ŽIR)
- Jablanica**
 - NGG "Za Doljanku"
- Konjic**
 - NGG "Neretvica - Pusti me da tečem"
- Kozarska Dubica**
 - NGG "Reaguj protiv nepravilnosti koji ugrozavaju zdravlje i životnu sredinu"
- Kreševo**
 - NGG "Kreševski građanski pokret"
- Kakanj**
 - NGG „Park prirode Trstionica i Boriva“
- Livno**
 - UG "Centar za građansku saradnju" CGS Livno
- Maglaj**
 - NGG „Za legalnu eksploataciju minerala u gornjem toku rijeke Bosne“,
- Mostar**
 - NGG "Jer nas se tiče"
 - NGG "Stop izgradnji mHE Buna I i II"
 - NGG „Stop nelegalnoj gradnji na Bijelom Brijegu“
 - NGG „Ne na Buni i u mome Blagaju“
 - NGG „Građanska inicijativa Kuti“
 - Udruga za unapređenje kvalitete življenja Futura Mostar
- Petrovo**
 - NGG „Čuvari Ozrena“
- Prijedor**
 - Udruženje za zaštitu potrošača DON Prijedor
 - NGG „Budi moj glas“
- Sarajevo**
 - NGG "Hastahana park"
 - NGG „Zgrada“
 - NGG "Inicijativa KCUS"
 - Udruženje „Ja BiH u EU“
 - Udruženje poslodavaca u Federaciji BiH
 - BIRN BiH
 - Udruženje "Baby Steps"
 - Udruženje Sindikat uposlenika Fonda
 - NGG „Spas u zadnji čas – Spasimo Dobrinju“
 - Unija za održivi povratak i integracije u BiH
 - Centar za razvoj omladinskog aktivizma (CROA)
 - Inicijativa za šumarstvo i okoliš
 - Aarhus centar
 - Udruženje profesionalaca, trenera i službenika za javne nabavke u BiH (UPTIS)
- Šipovo**
 - NGG "Farmeri"
- Tešanj**
 - NGG "Netransparentno trošenje sredstava iz budžeta za vodosnabdjevanje građana"
- Trebinje**
 - UG "Stop mobbing"
 - NGG „Pokret za restituciju Trebinje“
- Trnovo**
 - NGG "Stop nelegalnom odlaganju otpada na Krupačkim stijenama"
- Tuzla**
 - Građanski pokret "Buđenje"
 - NGG "Inicijativa protiv odlagališta šljake i pepela iz Termoelektrane u MZ Šiški Brod"
 - Udruženje Forum građana Tuzle
- Visoko**
 - NGG „Za sprječavanje zloupotreba prilikom izdavanja dozvola za rad privređivača igara na sreću (kladionica, lutrija i sl.)“
- Višegrad**
 - NGG "Odbranimo rijeke Višegrada"
 - NGG „Uklonimo nelegalnu deponiju pred turističkim gradom“
- Vitez**
 - NGG "Hrabre žene Kruščice"
 - NGG "Naše zgrade - naše pravo da znamo"
- Zenica**
 - NGG "Čuvari zraka"
 - NGG "Pokret za preokret"
 - NGG „NEpodobni NEzaposleni“
- Zvornik**
 - NGG „STOP nelegalnim šljunkarama na rijeci Drini“
 - NGG „Stop izgradnji asfaltne baze u Tršiću“
- Žepče**
 - NGG „Spriječimo nelegalnu eksploataciju šljunka na području Žepča i Zavidovića“



OBILJEŽEN MEĐUNARODNI DAN RIJEKA I SVJETSKI DAN VODA



Neformalne grupe građana su simbolično u sedmici kada se obilježava Međunarodni dan rijeka i Svjetski dan voda putem različitih aktivnosti (performansa, čišćenja rijeka, okruglog stola, ulične akcije) podsjetili javnost koje sve nepravilnosti i zloupotrebe u njihovim lokalnim zajednicama ugrožavaju vodu kao jedan od najznačajnijih prirodnih resursa. Osim toga na nekoliko lokacija širom Bosne i Hercegovine su građani putem info letaka obaviješteni o korupciji protiv koje se bore neformalne građanske grupe. Iz 8 gradova širom Bosne i Hercegovine je poslana jedinstvena poruka građanima da se pridruže borbi za očuvanje voda i rijeka, a protiv nezakonitosti koje ih ugrožavaju.

“Evidentno je da su nam rijeke i vode uopšte svakim danom sve zagađenije i da ćemo se vrlo brzo suočiti sa nedostatkom pitke vode”, upozoravaju aktivisti. Oni godinama dižu glas kako bi zaštitili taj, jedan od osnovnih elemenata života i uslova opstanka živog svijeta, koji ujedno predstavlja posebno bogatstvo ove zemlje. Zahvaljujući svojoj upornosti i hrabrosti u svojoj borbi ostvaruju pobjede, pomjeraju granice, poništavaju štetne dozvole i nastavljaju svoju bitku, ostvarenje čijeg cilja, međutim, zahtjeva sazrijevanje kolektivne svijesti o važnosti ove borbe i uključivanje što većeg broja građana u nju.





ODRŽAN TRENING ZA LIDERE U OBLASTI ANTIKORUPCIJSKOG AKTIVIZMA

U Sarajevu je, 15. i 16. marta, održan dvodnevni trening za lidere u oblasti antikorupcijskog aktivizma u organizaciji Centara civilnih inicijativa (CCI). 16 osoba iz cijele Bosne i Hercegovine zainteresovanih za borbu protiv korupcije u svojim lokalnim zajednicama i pozitivne promjene u svom okruženju, su, u okviru programa za lidere u oblasti antikorupcijskog aktivizma, dobili edukaciju iz oblasti zagovaranja, te, vođenja PR kampanja. Osim toga, učesnici su imali priliku da razgovaraju sa građanskim aktivistima koji se godinama bore protiv korupcije u njihovoj lokalnoj sredini te da čuju njihova iskustva.

Medina Bejtović, učesnica treninga koja dolazi iz Prijedora izjavila je: *“Zadovoljstvo je bilo raditi sa ljudima koji su svjesni značaja pojave korupcije u bosansko-hercegovačkom društvu. Kroz module prokomentarisali smo konkretne primjere i dali osvrt na širok dijapazon ove pojave u našem društvu. Aktivno udruživanje građanstva je ključno za rješavanje korupcije koja je ušla u sve pore društva.”*



Harun Porča iz Zenice je, nakon treninga, istakao:

“Na obuci za lidere iz oblasti antikorupcijskog djelovanja sam se upoznao o radu i djelovanju CCI-a. Jedna od najvažnijih stvari koje bih mogao da izdvojim je to da ja mogu da napravim promjene u svom okruženju i da zaista imam ljude iza sebe i mogu reci da je ovo vjetar u leđa“.



“Obzirom da je dvodnevna obuka tek završila, utisci su uzburkani i trebat će vremena da se slegnu. Osjećam se odlično, uzbuđeno i spremno za dalji rad zahvaljujući timu organizatora, interakciji koju su izazivali i opuštenu atmosferu. Obuka nam je približila pojam korupcije i sada nam je mnogo lakše detektirati probleme u lokalnim zajednicama. Isto tako, osvješteniji smo o količini nelegalnih radnji koje prolaze neopaženo dok se građanima skreće pažnja svakodnevno nekim trivijalnim pitanjima i problemima. Još jednom se zahvaljujem organizatorima i učesnicima, uz nadu da se naša saradnja ne završava ovdje i da ćemo zajedno voditi borbu za pravičnije i bolje društvo Bosne i Hercegovine”, izjavila je Sevda Muratović iz Velike Kladuše.

“Obuka iz oblasti antikorupcijskog aktivizma pružila mi je nove poglede na oblast korupcije u lokalnoj zajednici. Shvatila sam da se koruptivne radnje dešavaju svuda oko nas te da smo i sami svjesni brojnih primjera na lokalnom i državnom nivou, kao i velikog broja uspješno realizovanih kampanja podržanih od strane Centra civilnih inicijativa. Ova obuka mi je pomogla da targetiram probleme u lokalnoj zajednici i kroz budući angažman radim na realizaciji kampanja kojim ću ukazati na neki od problema. Lične priče i borbe ljudi koji su se susretali sa rješavanjem nekog društvenog pitanja od značaja za širu zajednicu mi je poslužio kao vjetar u leđa da su sve prepreke moguće za prelazak i da je društveni angažman ono veće dobro koje stavljamo ispred ličnog interesa”, istakla je Elma Hasanspahić iz Zenice, učesnica treninga.



“Predavanja su bila profesionalno odrađena, svidio mi se uvod kao i upoznavanje i važnost svakog člana pojedinačno. Predavanja su bila opuštenijeg tipa, ali opet sa dosta informacija i konkretnih primjera, nije zamorno s obzirom na dužinu, a opet se dosta informacija nauči. Dolazak aktivista i njihova iskustva su bila zanimljiva”, izjavio je učesnik treninga Adem Kahrmanović iz Sarajeva.

Nakon održanog treninga, polaznici ovog programa će imati mogućnost za praktičan rad u svojim lokalnim zajednicama koji će biti usmjeren na identifikaciju lokalnih problema i vođenje javnih kampanja.

Inače, za učešće na ovom treningu, zainteresovani pojedinci, spremni da daju svoj doprinos u borbi protiv korupcije kroz aktivan angažman u lokalnoj zajednici, su se prijavili putem javnog poziva koji su Centri civilnih inicijativa raspisali u februaru.





Organizacije civilnog društva i neformalne grupe građana prošle edukaciju o tome kako pridobiti medije kao saveznike u javnom zagovaranju

Sredinom marta, Centri civilnih inicijativa su organizovali trening “Kako pridobiti medije kao saveznike u javnom zagovaranju?”, za organizacije civilnog društva - korisnike grantova i predstavnike neformalnih grupa građana koje realizuju kampanje u oblasti borbe protiv korupcije.

Učesnici su prošli trening o alatima za komuniciranje te vještinama komuniciranja sa medijima u cilju boljeg promovisanja javno - zagovaračkih kampanja koje realizuju! Dodatno su razmijenili svoja iskustva u komuniciranju sa medijima tokom dosadašnje borbe.





VLADA FBiH NA “POPRAVNOM” ZA FOND SOLIDARNOSTI

Odbor za ekonomsku i finansijsku politiku Predstavničkog doma Parlamenta FBiH ipak je prepoznao važnost inicijative za unapređenje finansiranja Fond solidarnosti FBiH koju su Centri civilnih inicijativa zajedno sa organizacijama civilnog društva koje okupljaju pacijente korisnike usluga Fonda solidarnosti FBiH podnijeli ovom Odboru u januaru 2023. godine. U skladu sa tim, Odbor za ekonomsku i finansijsku politiku Predstavničkog doma Parlamenta FBiH je u Dnevni red svoje sjednice uvrstio i ovu tačku. Time je učinjen prvi korak u vraćanju finansiranja Fonda solidarnosti FBiH u zakonom propisane okvire. Tokom radnog dijela sjednice Odbora, nedvosmisleno je iskazana podrška inicijativi organizacija civilnog društva što je na kraju potvrđeno i zaključkom ovog Odbora. Odbor je zadužio Vladu FBiH da prilikom rebalansa Budžet FBiH za 2023. godinu usvoji budžetski zahtjev Fonda zdravstvenog osiguranja i reosiguranja FBiH. Na taj način će se osigurati dodatnih 40 miliona KM za potrebe rada Fonda.

Drugim dijelom zaključka apostrofirana je potreba da se prilikom izrade Budžeta FBiH konačno počnu poštovati odredbe Zakona o zdravstvenom osiguranju FBiH kojim je propisana obaveza Vlade FBiH da finansira rad Fonda. Na ovaj način bi se povećali prihodi Fonda za više od 100 miliona KM što bi pacijentima, korisnicima usluga Fonda, značajno unaprijedilo uslugu zdravstvene zaštite. Također, dodatnim приходima Fonda otvorio bi se prostor i za uvođenje drugih pacijenata u pravno zdravstvenu zaštitu posredstvom Fonda za što postoji nesporna potreba. Sjednici odbora su prisustvovali predstavnici Ministarstva zdravstva FBiH, Ministarstva finansija FBiH, Zavoda zdravstvenog osiguranja i reosiguranja FBiH te predstavnici Centara Civilnih Inicijativa. CCI su 20. januara ove godine uz podršku još nekoliko organizacija civilnog društva Predstavničkom domu Parlamenta FBiH, Kolegiju, Klubovima poslanika političkih stranaka zastupljenih u Predstavničkom domu, kao i zastupnicima uputili Inicijativu za usklađivanje Prijedloga Budžeta Federacije BiH za 2023. godinu sa Zakonom o zdravstvenom osiguranju FBiH u pogledu finansiranja rada Fonda solidarnosti FBiH. Početkom marta, Ministarstvu finansija FBiH je CCI uz podršku većeg broja organizacija civilnog društva uputio Zahtjev za primjenu odredbi Zakona o zdravstvenom osiguranju FBiH pri izradi Dokumenta okvirnog budžeta FBiH 2024 – 2026. i nacrta Budžeta Federacije BiH za 2024. godinu. Dodatno, Ministarstvu zdravstva FBiH je upućen Zahtjev za primjenu odredbi Zakona o zdravstvenom osiguranju FBiH prilikom planiranja tekućeg transfera za Zavod za zdravstveno osiguranje i reosiguranje FBiH u procesu izrade Dokumenta okvirnog budžeta FBiH za period 2024 – 2026. i nacrta Budžeta Federacije BiH za narednu godinu.



KANTONALNI SUD U SARAJEVU PONIŠTIO OKOLINSKE DOZVOLE ZA IZGRADNJU MHE NA NERETVICI!

Kantonalni sud u Sarajevu uvažio je tužbu pokreta “Neretvica - Pusti me da tečem” i poništio obnovljene okolinske dozvole koje je Federalno ministarstvo okoliša i turizma izdalo Javnom preduzeću Elektroprivreda BiH za izgradnju mHE na Neretvici. Koalicija udruženja okupljenih u pokret “Neretvica – Pusti me da tečem”, na čelu sa udruženjem “Zeleni Neretva” iz Konjica je 29. maja 2020. godine, na samom početku borbe za Neretvicu, pokrenula upravni spor protiv okolinskih dozvola za gradnju dvije mHE na Neretvici, Sirijanski most i Gorovnik ušće, jer nije pravilno primijenjen Zakon o zaštiti okoliša FBiH u slučaju obnove/izdavanja okolinskih dozvola za dvije pomenute mHE. Okolinske dozvole za ove male hidroelektrane je izdalo Federalno ministarstvo okoliša i turizma Rješenjem od 17.02.2017. godine. Iako ova presuda dolazi skoro tri godine od kako je tužba podnesena, iako su dozvole za navedene mHE na Neretvici istekle još prošle godine, 08.06.2022. godine, iz pokreta „Neretvica – Pusti me da tečem“ su zadovoljni, jer je još jedna institucija svojom presudom pokazala da je bitka za Neretvicu od početka bila opravdana.

„Zadovoljni smo jer smo od početka tvrdili i argumentovali da dozvole, na koje su se pozivali, nisu validne, što se sada i dokazuje. Mi nastavljamo svoju časnu borbu i pozivamo Grad Konjic i JP Elektroprivreda Bosne i Hercegovine da konačno raskinu ovaj štetni ugovor za izgradnju mHE na Neretvici. Sada više nemaju nijedan razuman razlog da to ne učine“ – poručili su iz ovog Pokreta.

Više na portalu antikorupcija.info



JOŠ UVIJEK NA ČEKANJU RASKID KONCESIONOG UGOVORA ZA MHE NA BUNSKIM KANALIMA

Građanska inicijativa „STOP izgradnji mHE na Buni“ je pred novi saziv Skupštine HNŽ/K stavila zadatak raskida koncesionog ugovora za izgradnju mHE na Bunskim kanalima. Naime, nakon što je Gradsko vijeće Mostara izbrisalo iz Prostornog plana grada Mostara dvije lokacije za izgradnju mHE na Bunskim kanalima, mještani naselja Buna su se obratili novom sazivu Skupštine sa zahtjevom da pokrene inicijativu za raskid koncesionog ugovora. U pismu kojim su se obratili svim zastupnicima, obrazložili su problem i iznijeli svoja očekivanja po pitanju daljih koraka koje je potrebno poduzeti kako bi ovaj lokalitet bio trajno zaštićen od gradnje mHE. Održali su i par sastanaka sa vijećnicima što je rezultiralo pokretanjem tri inicijative za raskid koncesionog ugovora. Na jednoj od sjednica Skupštine, kao tačka dnevnog reda našla se i Informacija o realizaciji potpisanih koncesionih ugovora zaključno sa 2021. godinom. Kako su se ključne promjene u Gradskom vijeću Mostara (izmjene Prostornog plana Grada Mostara) dogodile u 2022. godini, iz resornog ministarstva su najavili da će najnovije informacije vrlo brzo biti na zastupničkim klupama čime bi se otvorila prilika za pokretanje skupštinske inicijative za raskid koncesionog ugovora.





POKRENUTA TUŽBA ZBOG „NOVE“ OKOLINSKE DOZVOLE ZA DEPONIJU UBORAK



Početak 2023. godine Građanska inicijativa „Jer nas se tiče“ je obilježila pokretanjem tužbe u predmetu izdavanja „nove“ Okolinske dozvole za deponiju Uborak izdate od strane Federalnog ministarstva okoliša i turizma, koje je za manje od mjesec dana, nakon što je Kantonalni sud u Sarajevu presudio u korist Udruženja, izdalo novu Okolinsku dozvolu za ovu deponiju. U isto vrijeme, udruženje je poslalo Zahtjev Gradu Mostaru da odustane od Plana prilagodbe i radi na zatvaranju i sanaciji postojeće deponije i iznalaženju nove lokacije. Ove aktivnosti prpratila je ulična akcija dijeljenja informativnog letka i lijepljenje postera sa ponovljenim zahtjevima. Kada je izdata nova Okolinska dozvola, udruženje je organizovalo i konferenciju za medije na kojoj je ponovilo svoje zahtjeve i još jednom naglasilo da neće odustati sve dok isti ne budu realizirani.



Mještani Holijaka traže da se utvrdi krivična odgovornost u vezi sa nelegalnom deponijom pred njihovim domovima

Neformalna grupa građana „Uklonimo nelegalnu deponiju pred turističkim gradom Višegradom“ podnijela je krivične prijave protiv odgovornih lica u slučaju nelegalne deponije u mjestu Holijaci, Višegrad. Prijava je podnesena 11.01.2023. na adresu Okružnog tužilaštva Istočno Sarajevo.

Krivična prijava je podnesena protiv odgovornih lica u komunalnom preduzeću „Komunalac“ a.d. Višegrad i odgovornih lica u Opštini Višegrad, kao i ostalih NN lica, zbog sumnje na: zloupotrebu službenog položaja ili ovlaštenja, zagađivanje životne sredine, zagađivanje životne sredine otpadnim materijama, izazivanje opšte opasnosti te drugih krivičnih djela propisanih Krivičnim zakonikom RS prema osnovanim sumnjama Tužilaštva.



„Mi, mještani, svaki dan svjedočimo odlaganju opasnog otpada, animalnog otpada, sakupljaju se glodari i napuštene životinje, a ponekad do svojih kuća ne možemo proći kada se deponija pali ili kada se podzemne vode podignu i stvore poplavu“, istakla je članica ove grupe Ramiza Karčić, te dodala „Zbog svega ovoga, podnijeli smo krivičnu prijavu protiv odgovornih lica u komunalnom preduzeću „Komunalac“ a.d. Višegrad, odgovornih lica u Opštini Višegrad, kao i ostalih NN lica, te očekujemo od Okružnog tužilaštva Istočno Sarajevo da postupi u što skorijem roku po našoj prijavi.“



Građani traže zatvaranje i sanaciju ogromne divlje deponije u Nedićima u općini Breza

Povodom Svjetskog dana voda, aktivisti i aktivistkinje Inicijative „Uklonimo divlju deponiju u Nedićima“, organizovali su akciju čišćenja u općini Breza na području na kojem se nalazi divlja deponija u Nedićima i uz obale rijeke Stavnje koja protiče odmah pored same divlje deponije, te su tim povodom ukazali na dugogodišnji problem sa kojim se suočavaju u svojoj lokalnoj zajednici. Iz Inicijative su poručili kako se građani i građanke Općine Breza godinama suočavaju sa problemom upravljanja otpadom u ovoj općini, jer Općina Breza još uvijek nije regulisala pitanje odvoza otpada, a JP „Komunalno“ d.o.o. Breza i lokalna vlast kao rješenje koriste lokaciju u naselju Nedići koja nije predviđena za deponovanje otpada. Ova deponija se nalazi na samoj granici Općine Breza i Općine Vareš, odmah sa lijeve strane regionalne ceste R-444 (Podlugovi – Breza – Vareš), pored rijeke Stavnje koja protiče svega nekoliko metara od samog odlagališta smeća.

Smeće se na ovu lokaciju povremeno odvozilo posljednjih 10 godina, a lokacija je služila neko vrijeme kao pretovarna stanica. Ponovno odlaganje otpada je počelo prije tri godine i od tada je ta lokacija opet zatrpana ogromnim količinama otpada.

„Nama mještanima je postalo jasno da se u Nedićima više ne radi o pretovarnoj jedinici, a prema rješenju općinske sanitarne inspektorice, u Nedićima se radi o svjesno stvorenoj ogromnoj divljoj deponiji, na kojoj je stanje alarmantno po pitanju sanitarno-higijenskih uslova kompletnog prostora i koja predstavlja opasnost za život i zdravlje ljudi i životne sredine“, poručili su iz Inicijative „Uklonimo divlju deponiju u Nedićima“.

Građani od nadležnih organa traže da se konačno riješi problem upravljanja otpadom u Općini Breza, što podrazumijeva zatvaranje i sanaciju divlje deponije u Nedićima, te iznalaženje nove i odgovarajuće lokacije za deponovanje otpada uz poštivanje zakonskih propisa.



Zbog sumnje na zloupotrebu službenog položaja ili ovlaštenja, pokrenute krivične prijave protiv odgovornih za donošenje sporne Odluke o davanju prethodne saglasnosti za istraživanje i eksploataciju dolomita u MZ Poriče

Prva tri mjeseca 2023. godine, neformalne grupe građana su pojačale pritisak na općinske i kantonalne vlasti kako bi se pokrenula procedura poništenja sporne Odluke OV Bugojno o davanju prethodne saglasnosti za eksploataciju dolomita u MZ Poriče kao i preispitivanja te poništenja Ugovora o koncesiji za lokalitet Bukovački potok u MZ Poriče. Početkom februara upućeno je otvoreno pismo Vladi SBK u kojem pozivaju odgovorne da pokrenu aktivnosti za preispitivanje i raskid ugovora za planirani kamenolom u MZ Poriče, Bugojno. Nakon toga upućen je Zahtjev premijeru Vlade SBK za održavanje sastanka na kojem bi aktivisti argumentovano iznijeli podatke o neregularnostima i tražili održavanje sjednice Vlade sa tačkom dnevnog reda o spornoj koncesiji. I pored upućivanja urgencija premijeru i šefu Kabineta, termin za sastanak nije zakazan, nego je zahtjev preusmjeren Ministarstvu privrede koje takođe nije dostavilo odgovor.

Aktivisti NGG Poriče su organizovali i tri protesta ispred zgrade općine Bugojno, prije svake sjednice OV Bugojno. Tri puta su opozicioni predstavnici stavljali na dnevni red spornu Odluku OV Bugojno, kojom se dala prethodna saglasnost na koncesiju kamena dolomita, ali nijednom nije imala potrebnu većinu. Na sjednici OV Bugojno održanoj 16.03.2023. odbijeni su zahtjevi opozicionih vijećnika za stavljanje na dnevni red raspravu o spornoj Odluci kao i preporuku Institucije ombudsmena za ljudska prava BiH koja je dostavljena OV na uvid te izjašnjavanje o nepostupanju OV Bugojno po upućenoj Inicijativi mještana MZ Poriče. Općinska Služba za privredu i društvene djelatnosti je, na zahtjev investitora, zakazala Javnu raspravu sa mještanima MZ Poriče i investitora za 13.03.2023. Veliki broj mještana, medija i zainteresovanih građana Bugojna se okupilo u sali općine Bugojno, ali je rasprava okončana bez ikakvog zaključka jer predstavnici Općine nisu došli niti su poslali bilo kakvo obrazloženje izostanka. Krajem marta predstavnici NGG Poriče su podnijeli krivičnu prijavu Kantonalnom tužilaštvu SBK protiv načelnika općine, šefa Službe za privredu i ostalih odgovornih lica u OV Bugojno zbog sumnje na počinjenje krivičnih djela zloupotreba položaja ili ovlaštenja i drugih krivičnih dijela propisanih Krivičnim zakonom FBiH.



Bez obzira na presudu u korist građana, kamenolom Kuti još uvijek nije izbrisan iz Prostornog plana Grada Mostar

Nakon izricanja presude u korist Građanske inicijative Kuti, aktivisti su poduzeli cijeli niz aktivnosti kako bi se u najkraćem mogućem roku realizovao usvojeni Zaključak Gradskog vijeća Mostara o brisanju kamenoloma Kuti iz Prostornog plana Grada Mostar. Međutim, nakon upućenih zahtjeva za realizaciju Zaključka, predsjednik Gradskog vijeća Salem Marić je u svome odgovoru naveo kako sudski spor nije još završen i da se Zaključak neće realizovati do konačne presude. Na ovaj način je pokazao nerazumijevanje razlike između sudskog spora i upravnog postupka, jer je dio presude u kojem je rečeno da se okolinska dozvola poništava i predmet vraća na ponovno postupanje protumačio kao ponovni sudski spor, a ne kao novi upravni postupak u kojem će investitor u slučaju da iskaže namjeru obnove postupka, od nadležnog ministarstva zatražiti novu okolinsku dozvolu što znači da sud sa daljim postupanjem nema ništa. Investitor je ponovno podnio zahtjev, služeći se ranijom dokumentacijom (isti zahtjev koji je podnesen i prilikom ishodovanja prethodne okolinske dozvole) na koji su aktivisti, nakon što su izvršili javni uvid u dokumentaciju, u zakonskom roku uložili pisane komentare i primjedbe. Nakon izvjesnog vremena Javni poziv za uvid u podneseni Zahtjev je povučen sa službene stranice Ministarstva nakon čega su aktivisti uputili službeni upit zbog čega je zahtjev povučen. Predstavnici Građanske inicijative Kuti su pored ovih aktivnosti održali i sastanke sa zamjenikom predsjedavajućeg i nekima od opozicionih zastupnika u Skupštini HNŽ/K te zatražili od kantonalnog Ministarstva gospodarstva raskid koncesionog ugovora, što je isti odbio. Par vijećnika opozicionih stranaka u Gradskom vijeću Mostara iskazalo je želju i posjetilo lokalitet kamenoloma i uvjerio se u istinitost svih navoda predstavnika Građanske inicijative Kuti.



AKTIVISTI NGG „PARK PRIRODE TRSTIONICA I BORIVA“ POKRENULI INICIJATIVU ZA ZAKONSKU ZAŠTITU LOKALITETA TRSTIONICE I BORIVE ČIJA ZAŠTITA JE PLANIRANA PROSTORNIM PLANOM ZDK (2009.-2029.)

Početak 2023. godine, aktivisti su usmjerili svoje aktivnosti u dva pravca, prvi je kontinuirano slanje zahtjeva kantonalnoj i općinskoj inspekciji da se saniraju posljedice na terenu nakon odlaska betonare, a drugi je pokretanje Inicijative za zakonsku zaštitu šireg područja Trstionice i Borive.

Građani su uputili zahtjeve inspeksijskim organima Općine Kakanj-komunalnom inspektoratu i Kantonalnoj upravi za inspeksijske poslove – Sektor za poljoprivredu, vodoprivredu i šumarstvo na koje su dobiveni odgovori da su izašli na teren te da je sanacija prostora bivše betonare uglavnom završena, ali da su ostale posljedice koje nisu opasne po okoliš, više su estetske prirode i ne ugrožavaju okoliš.

U januaru, grupa je uputila Zahtjev za pokretanje Inicijative za zakonsku zaštitu lokaliteta Trstionice i Borive na adresu općinske Službe za privredu i predsjedavajućem OV Kakanj. Zahtjev za pokretanje Inicijative je bio predmetom rasprave Kolegija OV Kakanj i donesen je zaključak da se Inicijativa NGG uputi resornom ministarstvu prostornog uređenja ZDK putem Službe za privredu, urbanizam i zaštitu okoline Općine Kakanj.

Na zahtjev građana 16.02.2023. održan je sastanak sa predsjedavajućim OV Kakanj i šefom Službe za privredu, urbanizam i zaštitu okoliša na kojem je dobivena podrška zahtjevima u Inicijativi te je dogovoreno da će Služba uputiti Zahtjev resornom ministarstvu ZDK za očitovanje po Inicijativi građana za pokretanje zakonske procedure zaštite tog lokaliteta. Usaglašen Zahtjev kao i tekst Inicijative, Služba je uputila 07.03.2023. na adresu Ministarstva prostornog uređenja, prometa i komunikacija i zaštite životne sredine ZDK na uvid i očitovanje.



NEDOVOLJNO SREDSTAVA ZA PROJEKTE ZAŠTITE VODOTOKA U FBIH

Za proteklu godinu finansijskim planom Agencije za vodno područje rijeke Save u Federaciji BiH za uređenje riječnih korita i radove odbrane od poplava planirano je deset miliona maraka, a da su potrebe znatno veće govori podatak da su Agenciji dostavljeni prijedlozi projekata regulacije korita vodotoka samo Prve kategorije u 2023. godini od 70 do 80 miliona maraka. Sumirajući prethodnu godinu direktor Agencije za upravljanje vodotokom u FBiH Sejad Delić naglašava da shodno svom Planu i finansijskom planu, Agencija može izdvojiti značajno manje novca za preventivne aktivnosti zaštite od poplava od upućenih zahtjeva sa terena. To bi moglo značiti da građani i u ovoj godini mogu očekivati nove nedaće i opasnosti od poplava, kakve su zaprijetile u posljednjem mjesecu protekle godine.

U istraživanju problema sa kojim se susreće Agencija za vodno područje rijeke Save, na čije Javne pozive se sve manje javljaju privredna društva koja se bave eksploatacijom šljunka, aktivisti koji se u slivu rijeke Bosne zalažu za uređeno korito ovog vodotoka i bore protiv nelegalnog šljunčarenja, tvrde da je nezainteresovanost lokalnih šljunkara za ove radove upravo zbog koruptivne eksploatacije minerala u susjednom entitetu.

“To priznanje smo dobili upravo od šljunkara iz Maglaja, Zavidovića, Žepča, pa i Zenice, koji kažu da, njih što se tiče, zanima ih samo šljunak i pijesak u svrhu dalje prodaje i druge proizvodne potrebe, te da im nije uopšte stalo do Javnih poziva i nadmetanja na tenderima. Time zapravo priznaju da je njihova briga za građane i zaštitu grada od eventualnih prirodnih nesreća od poplava čišćenjem korita radi produbljivanja i povećanja proticajnog profila sasvim u pozadini”, navode aktivisti, koji su u Žepču 21. marta organizovali Okrugli sto pod nazivom „Zaštitimo vodotok rijeka Bosne i Krivaje – STOP nelegalnom vađenju šljunka”.

Inače, Agencija za vodno područje rijeke Save - Sarajevo produžila je do 30.09.2023. godine sklopljene ugovore i izdate vodne saglasnosti do 31.12.2022. godine sa privrednim društvima na lokalitetima u podslivovima rijeka u Federaciji BiH.



Kantonalne vlasti ignorišu sve zahtjeve i dopise aktivista neformalne grupe “Zaštitimo izvore Mandeka” dok gradske vlasti Livna podržavaju otvaranje dijaloga o spornoj koncesiji

Gradani Livna su ponovili zahtjeve za održavanje sastanaka prema premijeru i ministrici privrede, prosljeđene su i urgencije za dostavljanje informacija i prijedlog za otvaranje dijaloga, ali grupa nije dobila povratnu informaciju niti termin za održavanje sastanka.

U februaru je održan sastanak predstavnika NGG sa gradonačelnikom i predstavnicima Službi za graditeljstvo i geodetske poslove Grada Livna na kojem je data podrška ciljevima grupe i donesen Zaključak da će nadležne Gradske Službe uputiti zvaničan zahtjev resornom Ministarstvu gospodarstva da im se dostave informacije o koncesijama koje se tiču Grada Livna, među kojima je i koncesija za izvorišta Mandeka. Gradska Služba je uputila zahtjev resornom ministarstvu, ali još uvijek nisu dobili bilo kakav odgovor niti pojašnjenje, iako je istekao zakonski rok od 15 dana.

Grupa je prikupila svu raspoloživu dokumentaciju koja se tiče sporne koncesije u MZ Vidoši. Krajem januara u Livnu je održan okrugli stol pod nazivom „Argumenti za pokretanje zahtjeva za preispitivanje i stavljanje van snage ugovora o koncesiji za eksploataciju podzemne mineralne vode na lokalitetu MZ Vidoši“ na kojem su prisustvovali mještani MZ Vidoši, članovi NGG i predstavnik Grada Livna ispred Službe za urbanizam. Predstavnici Vlade K10, kao i predstavnici nadležnog Ministarstva gospodarstva nisu se odazvali pozivu. Nakon prezentacije ciljeva i aktivnosti NGG, kao i prezentacije dokumentacije koja je prikupljena, većina prisutnih su podržali zaključak da se uputi zvanična Inicijativa za preispitivanje i stavljanje van snage Ugovora o koncesiji za izvorište Mandeka. Inicijativa sa zahtjevima neformalne grupe građana i potpisima 170 mještana je upućena početkom marta na adrese Vlade K10 i resornog ministarstva gospodarstva. Još uvijek, neformalna grupa građana nije dobila nikakav odgovor iz Vlade ili Ministarstva niti komentare ili mišljenja o Inicijativi.

Paralelno sa pokretanjem Inicijative, grupa je započela širu medijsku kampanju za promociju zahtjeva u Inicijativi i pritisak na odgovorne u Vladi K10 da otvore dijalog i preispitaju spornu proceduru dodjele koncesije na eksploataciju vode u blizini njihovih izvorišta za pitke vode.



NAKON PROTESTA GRAĐANA, SKUPŠTINA KS ODUSTALA OD RASPRAVE NA TEMU NACRTA PRIVREMENE ODLUKE O ZAŠTITI IZVORIŠTA VODE ZA PIĆE “SARAJEVSKO POLJE” KOJOM BI SE VODOZAŠTITNE ZONE DRASTIČNO SMANJILE

Neformalna grupa građana „Hoćemo pitku vodu i čist zrak – protiv nelegalne gradnje na Bjelašnici i Igmanu“ je organizovala mirno okupljanje pred Skupštinom Kantona Sarajevo povodom sjednice zakazane za 27.01.2023. godine na kojoj su poslanici Skupštine Kantona Sarajevo trebali raspravljati o Nacrtu privremene odluke o zaštiti izvorišta vode za piće „Sarajevsko polje“. Nakon održanog mirnog okupljanja, građani su uputili otvoreno pismo kojim od zastupnika Skupštine Kantona Sarajevo traže da odbiju Nacrt privremene odluke o zaštiti izvorišta vode za piće „Sarajevsko polje“ kojom bi se vodozaštitne zone drastično smanjile.

“Ukoliko navedena privremena odluka bude usvojena to bi u budućnosti neminovno doprinijelo trajnom uništavanju dijela izvorišta pitke vode. Istovremeno, skrećemo vam pažnju na kontinuirano i svjesno obmanjivanje javnosti, pojedinaca iz kantonalnih institucija koji tvrde da izvorišta pitke vode nisu pravno zaštićena. To nije tačno. Odlukom iz 1987. godine izvorišta pitke vode pravno su zaštićena, ali je problem da kantonalne institucije u posljednjih nekoliko mandata ne provode zaštitu u skladu sa svojim zakonskim obavezama”, istakli su građani u ovom otvorenom pismu.

Nakon svega, Skupština Kantona je odustala od rasprave na temu Nacrta privremene odluke o zaštiti izvorišta vode za piće “Sarajevsko polje” na toj sjednici Skupštine te se o ovoj temi nije raspravljalo ni na narednim sjednicama.



Građani Trebinja mirnim protestima pokazali da neće dopustiti gradnju na poljoprivrednom zemljištu!

Početak godine institucije Republike Srpske su izvršile prenos vlasništva nad zemljištem na lokaciji Pridvorci Grad Trebinje sa Republike Srpske na Opštu bolnicu Trebinje te je najavljeno skoro ishodovanje građevinske dozvole i početak radova. Na to su aktivisti odgovorili mirnim protestima u centru grada na kojima su ponovili svoje zahtjeve i još jednom iskazali odlučnost da se izbore za svoja građanska prava. U isto vrijeme je i Republička uprava za inspekcijske poslove Odjeljenje Istočno Sarajevo na zahtjev aktivista izvršila inspekcijski nadzor u Ministarstvu za prostorno uređenje, građevinarstvo i ekologiju u predmetu izdavanja lokacijskih uslova pri čemu je utvrđena nepravilnost u postupku izdavanja predmetnih lokacijskih uslova. Izdato je Rješenje kojim je Ministarstvu naređeno da lokacijske uslove uskladi sa Zakonom ili da iste proglasi nevažećim. Inače, zbog ovih nezakonitih radnji, u 2022. godini Pokret za restituciju Trebinje je uputio Apelaciju Ustavnom sudu BiH, a kako ista nije riješena, u martu 2023. godine upućena je urgencija prema ovoj instituciji.

Početak februara, Udruženje je pokrenulo kaznene prijave protiv: službenih i odgovornih lica Grada Trebinja, Vlade Republike Srpske, Pravobranilaštva Republike Srpske i Republičke uprave za geodetske i imovinskopravne poslove Republike Srpske, zbog osnova sumnje da su osumnjičeni izvršili krivična djela iz članova 315. (Zloupotreba službenog položaja ili ovlaštenja) i 322. (Nesavjestan rad u službi) Krivičnog zakona Republike Srpske.





U VISOKOM ODRŽAN FORUM „ZAŠTO SU OBJEKTI IGARA NA SREĆU U BLIZINI ŠKOLA I VJERSKIH OBJEKATA?“

Inicijativa „Tiket na ZIS“, koja upozorava na nepoštivanje Zakona o igrama na sreću FBiH, 21. marta 2023. godine organizovala je u Visokom Forum na temu „Zašto su objekti igara na sreću u blizini škola i vjerskih objekata?“. Na Forumu je ukazano da u Gradu Visoko postoji minimalno 14 objekata igara na sreću kao što su kladionice i uplatna mjesta koji se nalaze na vidno manjoj udaljenosti od 100 metara od obrazovnih ustanova i vjerskih objekata što nije u skladu sa navedenim zakonom, a čime je omogućena laka pristupačnost igrama na sreću maloljetnicima u Gradu Visoko.

Učešće na Forumu su uzeli Belmin Zukan, predsjednik Zakonodavno - pravne komisije Predstavničkog doma Parlamenta FBiH, Amra Pajt, predsjednica Aktiva direktora osnovnih i srednjih škola Grada Visoko, Nedžla Čolo, predsjednica Mreže vijeća učenika FBiH i Adi Zahirović, predstavnik Inicijative „Tiket na ZIS“. Iz Inicijative „Tiket na ZIS“ su izjavili da su poziv za učešće na Forum uputili i Ministarstvu finansija FBiH i predstavnicima Grada Visoko, jer su oni ključni u procesu izdavanja dozvola za rad priređivačima igara na sreću, međutim, niko od njih se nije odazvao ovom pozivu. Cilj ovog Forumu je bio upoznati javnost sa problemom kršenja zakona kada su u pitanju kladionice i uplatna mjesta priređivača igara na sreću u Visokom, a koja se nalaze na udaljenosti manjoj od one koja je propisana zakonom, ali i razgovarati o potencijalnim rješenjima.





DO ČLANSTVA U EVROPSKOJ ASOCIJACIJI ZA OSIGURANJE KVALITETA NEMA RJEŠENJA PROBLEMA NEPRIZNAVANJA DIPLOMA IZ BIH?

Da je zbog problema koje mogu imati, i već imaju, studenti koji se obrazuju na visokoškolskim ustanovama u BiH neophodno aktivnije angažovanja vlasti, kako onih političkih, tako i obrazovnih, očigledno postaje jasno i jednima i drugima. Na to su, istina, u javnost prvi iznijeli aktivisti neformalne grupe studenata „Akreditovane visokoškolske ustanove – priznate diplome“, nakon što su u javnost procurile informacije da u susjednoj Hrvatskoj, kao ni Sloveniji ne priznaju diplome stečene na visokoškolskim ustanovama u BiH.

Trenutno, još ne postoje naznake da bi se problem sa nepriznavanjem stečenih diploma na visokoškolskim ustanovama u Bosni i Hercegovini od strane nadležnih u Republici Hrvatskoj i Sloveniji mogao u skorije vrijeme razriješiti. Sve je izvjesnije, što indirektno priznaju i u Agenciji za razvoj visokog obrazovanja i osiguranje kvaliteta u BiH (HEA BiH), da bi se problem mogao prevazići članstvom bosanskohercegovačke Agencije za visoko obrazovanje u Evropsku asocijaciju za osiguranje kvaliteta (ENQA), koja je upisana u Evropski registar za osiguranje kvaliteta (EQAR).

Problemom sa bh. diplomama i visokim obrazovanjem u našoj zemlji napokon su se počeli baviti i u Ministarstvu civilnih poslova BiH, formalno nadležnim za oblast visokog obrazovanja. Njima u posjeti u prvoj polovini februara boravila je delegacija HEA BiH, koju su sačinjavali direktor Agencije, prof. dr Enes Hašić, i zamjenici direktora, Irena Šiško i Stevo Škrbić, a domaćini su im bili novoimenovana ministrica civilnih poslova Dubravka Bošnjak i njeni saradnici.



GRAĐANI ZENICE TRAŽE ODGOVORNOST ZBOG NEISPLAĆENE JEDNOKRATNE NAKNADE NEZAPOSLENIMA U ZDK

Grupa građana Zenice je do sada organizovala više puta proteste ispred zgrade JU Služba za zapošljavanje ZDK u Zenici zbog neisplaćene jednokratne naknade u iznosu od 100 KM koju su, prema Odluci Vlade Federacije BiH od 08.12.2022. godine, trebali dobiti do kraja 2022. godine. Zadnji protest organizovan je 16.01.2023. na kojem se okupilo stotinjak građana koji nisu dobili novac na svoje račune iako su se godinama i desetljećima redovno prijavljivali i na vrijeme dostavili sve što je traženo za isplatu, te se evidentirali na spisak Službe za zapošljavanje. Prema prikupljenim informacijama, oko 2.500 lica nije dobilo jednokratnu pomoć, iako su u roku dostavili sve tražene podatke potrebne za isplatu i zadovoljili sve uvjete za ostvarivanje prava na novčanu naknadu.

Krajem marta, građani su održali sastanak sa predstavnicima Ministarstva rada i socijalne zaštite ZDK na kojem je dobivena podrška ciljevima grupe, te je dogovoreno da Ministarstvo zvanično prema JU Službi za zapošljavanje ZDK uputi Zahtjev za dostavu informacija i podataka o broju korisnika i razlozima zašto nisu uplaćena sredstva jednokratne pomoći u iznosu od 100 KM. Takođe, sredinom marta je upućena poslovnička Inicijativa koju je Stručna služba Skupštine ZDK uputila JU Službi za zapošljavanje ZDK u kojoj je traženo pojašnjenje neisplaćenih naknada za dio nezaposlenih osoba i da Služba snosi troškove održavanja bankovnih računa nezaposlenim licima koji nisu ostvarili svoja prava.



ZAJEDNO ZA ORTOPEDSKA I DRUGA POMAGALA BEZ KORUPCIJE

Nakon više od 8 mjeseci intenzivnog rada i realizovanih brojnih aktivnosti na projektu „Zajedno za ortopedska i druga pomagala bez korupcije“, kojeg Udruženje distrofičara Bužim implementira u partnerstvu sa udruženjem Amputirci Bužim, u mjesecu februaru je ostvaren veliki zagovarački uspjeh na ovom projektu. Naime, krajem mjeseca februara, kao odgovor na sve ranije podnesene inicijative i dopise prema Zavodu, udruženje je dobilo zvaničnu obavijest Zavoda da je u potpunosti implementirana najvažnija inicijativa udruženja, kojom je udruženje tražilo usvajanje antikoruptivnih akata za borbu protiv korupcije unutar Zavoda. Usvajanjem ovih akata Zavod je po prvi put formalno - pravno regulisao sva pitanja za antikoruptivan rad Zavoda, gdje je sada po prvi put pravno regulisan način prijave koruptivnih radnji i zloupotreba od strane korisnika i osiguranika, te postupci po podnesenim prijavama. Ovim aktima je predviđeno formiranje tima za borbu protiv korupcije unutar Zavoda koji će biti zadužen za implementaciju usvojenih akata, te će kroz godišnje izvještaje biti dužni izvijestiti o stanju korupcije, čime će se po prvi put moći dobiti precizni podaci o stanju korupcije unutar Zavoda na godišnjem nivou. Usvajanjem ovih akata, rad Zavoda je podignut na jedan viši javni nivo, gdje će postupci biti transparentniji i sigurniji za korisnike.

Također, Zavod je Udruženje obavijestio da je procedura izmjene i dopune Odluke o jedinstvenoj Listi ortopedskih i drugih pomagala u tjeku, čijim konačnim usvajanjem će biti u potpunosti implementirana druga najvažnija inicijativa udruženja kojom je tražena izmjena ove Liste u cilju povećanja kvaliteta ortopedskih i drugih pomagala za korisnike. Udruženje je dodatno od Zavoda tražilo da zbog postojeće inflacije izvrši analizu tržišta ortopedskih i drugih pomagala, te da shodno povećanju cijena, novom Listom planira veće učešće Zavoda u finansiranju brojnih pomagala kako bi se očuvao dostignuti kvalitet pomagala. I ovaj zahtjev Zavod je u potpunosti prihvatio, te je obavijestio da trenutno radi analizu cijena pomagala na tržištu, te će se prema izvršenoj analizi kreirati nova revidirana Lista ortopedskih i drugih pomagala. Usvajanjem pomenute dvije inicijative, svi sadašnji i budući korisnici ortopedskih i drugih pomagala će u sigurnijim i transparentnijim postupcima dobivati kvalitetnija ortopedska i druga pomagala. Udruženje će nastojati kod Zavoda zagovarati i potpuno usvajanje preostale dvije inicijative kojim traže izmjenu i dopunu uputstva o procedurama pribavljanja ortopedskih i drugih pomagala, te uključivanje reprezentativnih predstavnika organizacija civilnog društva u nadležne komisije za izdavanje ortopedskih i drugih pomagala.

ZAJEDNO PROTIV KORUPCIJE U PORODILIŠTIMA

Početakom 2023. godine, fokus kampanje »Zajedno protiv korupcije u porodilištima« je bio na jačanju uspostavljenih saradnji sa institucijama kroz dijalog, implementaciju sistema za prijavu korupcije, te sprovođenje edukacija osoblja porodilišta.

Dana 09.03.2023. u Sarajevu je održan okrugli sto na temu "Saradnjom do porodilišta bez korupcije", kojem su prisustvovali predstavnici institucija, Tužilaštva KS, članovi Komisija za ravnopravnost spolova i Komisija za zdravstvo Parlamenta FBiH i Skupštine KS, zatim Federalne uprave policije i Federalnog ministarstva zdravstva. Svi prisutni su izrazili spremnost za saradnju kao i stavljanje na raspolaganje svih potrebnih resursa kako bi se korupcija iskorijenila iz porodilišta ili svela na zanemariv postotak do konačnog nestanka. Efikasan rad na eliminaciji ovog problema podrazumijeva sistematski pristup, gdje se istovremeno edukuju pacijenti, radi sa medicinskim osobljem, uspostavljaju relevantni akti i mehanizmi prevencije, prijave i sankcionisanja koruptivnih radnji, te se uspostavljaju i kontrolišu standardi zdravstvene skrbi od strane viših instanci.

"Važno je da djelujemo iz naše nadležnosti, da svi imaju pristup nama i da se u slučaju počinjenja krivičnog djela reaguje odmah", poručila je Glavna kantonalna tužiteljica KS Sabina Sarajlija. Na press konferenciji održanoj 09.03.2023. godine najavljeno je puštanje u rad web-baziranog sistema sa ocjenu porodilišta i anonimnu prijavu korupcije. Sistem je od početka marta dostupan porodiljama iz četiri porodilišta u BiH. Porodilje iz Tuzle, Banja Luke i Bijeljine portalu pristupaju putem jednokratne šifre koju dobiju u porodilištu, dok porodilje iz Opće bolnice u Sarajevu portalu pristupaju bez pristupne šifre.

Također, u ovom kvartalu su održane edukacije o korupciji namijenjene medicinskom osoblju i menadžmentu porodilišta. Edukacije je održao akademik prof. dr. sc. Borislav Petrović, redovni profesor Pravnog fakulteta Univerziteta u Sarajevu i ekspert iz krivičnopravne naučne oblasti. Kroz edukacije, osoblje je upoznato sa različitim oblicima korupcije u zdravstvu, Krivičnim zakonom koji tretira oblast korupcije, te načinima kako da se osoblje nosi sa različitim situacijama gdje ih se navodi na korupciju.





Transparentno finansiranje neprofitnih organizacija iz Budžeta BD

Tokom perioda januar – mart 2023. godine održavale su se i ulične akcije kako bi Omladinski centar „Vermont“ imao priliku da kroz razgovor sa građanima dođe do informacija da su građani zabrinuti za stanje sporta u Brčko distriktu BiH te postoji strah kod građana da će se ukoliko se trenutna situacija nastavi u periodu od jedne godine ugasiti skoro svi sportski kolektivi, ali i većina kulturnih kolektiva. U prilog tvrdnji građana govori i činjenica da je veliki broj sportskih i kulturnih kolektiva koji je dobio sredstva iz budžeta lokalne zajednice tokom perioda izvještavanja dobio negativno mišljenje Komisije i zahtjev za vraćanje dijela odobrenih sredstva, ali i velikom broju slučajeva i sva odobrena sredstva. U nekim slučajevima u pitanju su i iznosi do 40.000,00 KM. Razlozi odbijanja izvještaja bili su između ostalog tehničke prirode, a najmanje zbog sumnje u zloupotrebu odobrenih sredstava.

U mjesecu februaru, Omladinski centar „Vermont“ održao je interaktivnu debatu na kojoj su učestvovali sportski i kulturni kolektivi, ali i predstavnici izvršne i zakonodavne vlasti te su predstavljeni rezultati ankete o stanju sporta u Brčko distriktu BiH kao i polugodišnji izvještaj. Početak godine, a posebno mjesec mart, pokazao je niz pomaka u finansiranju neprofitnih organizacija nastalih iz upućenih inicijativa Omladinskog centra „Vermont“. Postiglo se da svih pet posmatranih odjeljenja uvede finansiranje isključivo putem javnog poziva, te da vrše kontinuirano praćenje odobrenih projekata odnosno programa na terenu, zajednički planiraju, ali i realizuju neke od aktivnosti sa korisnicima sredstava iz njihovih fondova što nije ranijih godina bio slučaj. Takođe, veliki napredak u radu Omladinskog centra „Vermont“ je i činjenica da su neka od Odjeljenja uvela javno otvaranje pristiglih prijedloga projekata čime javnost može odmah imati informaciju o svim razlozima nerazmatranja određenih prijedloga odnosno njihovom odbijanju iz tehničkih razloga.



Odjeljenje za privredni razvoj, sport i kulturu Vlade Brčko distrikta BiH po prvi put je uvelo javne konsultacije tokom javnog poziva koji je raspisan u toku mjeseca marta gdje su potencijalni korisnici mogli postaviti pitanja pisanim putem za koje su odgovori objavljeni na zvaničnoj stranici Odjeljenja. Pomenuto Odjeljenje objavilo je nova pravila finansijskog izvještavanja koja su dostupna na stranici, u kojima je usvojen veći broj prijedloga Omladinskog centra „Vermont“. Takođe, u izradi je novi pravilnik o donacijama u Odjeljenju za privredni razvoj, sport i kulturu putem koga će se definisati povlačenje sredstava na ovaj način.

Institucija Ombudsmena u Bosni i Hercegovini, koja je od sredine prethodne godine uključena u sprovođenje kampanje sa Omladinskim centrom „Vermont“, donijela je preporuke kojima nalaže Odjeljenju za privredni razvoj, sport i kulturu da dostavi Omladinskom centru „Vermont“ tražene informacije te o istim obavijesti i samu Instituciju Ombudsmena u roku ne dužem od 15 dana. Posebno je bitno napomenuti da je održan sastanak i sa novim Gradonačelnikom Brčko distrikta BiH, dr Zijadom Nišićem. Radnim sastankom definisani su koraci lokalne vlade na polju rješavanja pitanja stanja sporta u Brčko distriktu BiH i kulturnih kolektiva te izmjena i usvajanje zakonskih i podzakonskih akata koji doprinose suzbijanju korupcije na lokalnom nivou.





**NE DAMO
RIJEKU BOSNI!**
Stop mHE Bilješevo!

NEĆE BITI DOZVOLJENA IZGRADNJA mHE NA RIJECI BOSNI?

U ovoj godini Aarhus Centar u BiH nastavio je priču o zabrani izgradnje mHE Bilješevo na rijeci Bosni, pa su tim povodom i podsjetili javnost da su još prošle godine uputili Inicijativu koju je potpisalo 2.000 građana Kakanja, a kojom je zatraženo odbacivanje Prijedloga Odluke o davanju saglasnosti za provođenje koncesija za izgradnju mHE “Bilješevo” na rijeci Bosni kao i donošenje Zaključka o zabrani planiranja i izgradnje malih hidroelektrana na teritoriji općine Kakanj. Općinsko vijeće je bilo dužno u roku od 60 dana da razmatra pomenutu Inicijativu, taj rok nije ispoštovan, pa je Aarhus centar u BiH uputio niz urgencija. Nažalost, do danas Općinsko vijeće Kakanj još uvijek nije razmatralo inicijativu, a što je dužno učiniti u skladu i sa Statutom ove Općine.

Godinu dana poslije, predsjednici Mjesnih zajednica Bilješevo i Modrinje, Eldin Gađun i Rašid Šahinović, su nam potvrdili da im je, u usmenom razgovoru, načelnik Općine Kakanj Mirnes Bajtarević obećao da neće doći do izgradnje mHE na rijeci Bosni. Načelnik ih je na sastanku, koji je sam organizovao, izvjestio da će se volja građana poštovati i da se nikakve dozvole neće izdavati, a pogotovo da se neće dozvoliti njena izgradnja na rijeci Bosni.

„Nama kao udruženju je drago čuti, pa i vidjeti da lokalne vlasti direktno saraduju sa građanima i poštuju njihovu volju. Svakako nastavljamo da pratimo situaciju i čekamo zvanično odbacivanje Prijedloga Odluke o davanju saglasnosti za provođenje koncesija za izgradnju mHE “Bilješevo” na rijeci Bosni kao i donošenje Zaključka o zabrani planiranja i izgradnje mHE na teritoriji općine Kakanj, jer pisani trag o ovoj odluci OV Kakanj ipak mora biti izdat“, naglašavaju iz Aarhus centra u BiH.

Više na portalu antikorupcija.info



ODGOVOR

STRUČNA ANALIZA: POD HITNO NAM TREBA NOVI ZAKON O VODAMA FBIH!

Povodom Svjetskog dana voda koji se obilježava 22. marta, u Sarajevu je u organizaciji Aarhus centra u BiH održan okrugli sto na kojem je predstavljena Analiza Nacrta Zakona o izmjenama i dopunama Zakona o vodama FBiH za potrebe koje su angažovali, za stručni dio analize akademika Muriza Spahića, osnivača Udruženja geografa BiH i bivšeg dekana na Prirodno-matematičkom fakultetu u Sarajevu, a pravni dio analize bio je povjeren Maji Mirković, magistrici prava, čija oblast ekspertize obuhvata međunarodno javno i krivično pravo.

Profesor Spahić je napomenuo da se Nacrt Zakona o izmjenama i dopunama Zakona o vodama FBiH temelji na Zakonu o vodi čiji je akt donešen davno i da je on trebao pretrpjeti nekoliko izmjena do sada. Takođe je naglasio da su vode koje su danas najproduktivnije za vodosnabdijevanje u BiH, uzete za izgradnju mini hidroelektrana i uništeno je preko stotinu malih vodotoka koji su nama trebali biti budućnost. Magistrica prava Maja Mirković napomenula je da je početkom 2021. godine na snagu stupio novi Zakon o zaštiti okoliša FBiH, kroz koji je veoma apostrofirana uloga javnosti, kako u kontekstu pristupa informacijama, tako i u donošenju odluka. U tom smislu, upravo se amandmanima i prijedlozima rješenja datim u Analizi Nacrta Zakona o izmjenama i dopunama Zakona o vodama FBiH naglašava značaj Aarhuske konvencije, kao i potrebe transpozicije njenih odredaba u domaće zakonodavstvo. Podsjetila je i na Zaključak Vlade FBiH od 26.11.2020. godine, kojim je Vlada usvojila Informaciju Federalnog ministarstva energije, rudarstva i industrije o Zaključku Predstavničkog doma Parlamenta FBiH, u vezi potpune zabrane izgradnje mHE na teritoriji cijele FBiH i Prijedlogu Deklaracije o zaštiti rijeka u FBiH, čime se otvara prostor za harmonizaciju različitih setova propisa, o čemu se vodilo računa prilikom kreiranja amandmana na Nacrt Zakona o izmjenama i dopunama Zakona o vodama FBiH. Stručni tim se složio da je najbolje rješenje zapravo izrada novog Zakona o vodama FBiH. Okruglom stolu su, između ostalih, prisustvovali i predstavnici Federalnog ministarstva poljoprivrede, vodoprivrede i šumarstva te predstavnici Agencija za vodno područje rijeke Save i Agencija za vodno područje Jadranskog mora.



ISTEKLI MANDATI KOMISIJE ZA KONCESIJE FBIH NE SMETAJU NIKOME

Povodom Saopćenja za javnost Aarhus centra pod nazivom „Šta radi Komisija za koncesije FBiH?“, a u kojem su se u mini istraživanju osvrnuli na njen rad i transparentnost, Aarhus centar je kontaktirao zamjenik federalnog ministra prostornog uređenja, gospodin Ivan Topić, koji je u pomenutom saopćenju naveden kao osoba koja je Federalnom parlamentu u aprilu prošle godine predložena od strane Vlade FBiH za predsjednika Komisije za koncesije FBiH. U telefonskom razgovoru gospodin Topić nam je rekao da je istina da je predložen za predsjednika Komisije za koncesije FBiH, ali je Federalni parlament odbio usvojiti tu odluku Vlade FBiH. Topić je potvrdio i pisanje da je mandat članova Komisije za koncesije Federacije BiH istekao još 2012. godine i da do danas niti jedan Vladin prijedlog novog saziva Komisije na Parlamentu nije prošao, što znači da dužnost već deceniju bespravno obavlja Komisija oformljena u prvoj dekadi 2000-ih.



ODRŽANI SASTANCI SA PREDSTAVNICIMA VLASTI U CILJU ZAGOVARANJA DONOŠENJA ZAKONA O ŠUMAMA

Aarhus centar je održao 4 sastanka sa predstavnicima vlasti u cilju zagovaranja donošenja Zakona o šumama FBiH. Svi zastupnici/delegati sa kojima su održani sastanci podržavaju inicijativu usvajanja Zakona o šumama FBiH. Obzirom da Zakon o šumama FBiH ne postoji od 2009. godine predstavnici vlasti poduprijet će Aarhus centar u ovoj inicijativi.



PRIPREMLJENI AMANDMANI NA PRIJEDLOG ZAKONA O ŠUMAMA FEDERACIJE BOSNE I HERCEGOVINE

Pokretanjem inicijative za usvajanje Zakona o šumama FBiH Aarhus centar je angažovao tim stručnjaka po Javnom pozivu. Stručnjaci iz oblasti prava, šumarstva i ekologije amandmane su pripremili u dogovorenom roku te su isti predani na Parlament 14.4.2023. u cilju zagovaranja usvajanja Zakona o šumama FBiH te stavljanja ovog zakona na dnevni red Predstavničkog doma Parlamenta FBiH.



DOSTAVLJENI PRAVNI PODSNESCI

Aarhus centar je dostavio ukupno 7 pravnih podnesaka različitim organima vlasti poput Federalne uprave za inspeksijske poslove, Federalnog ministarstva poljoprivrede, vodoprivrede i šumarstva, Ministarstva poljoprivrede, šumarstva i vodoprivrede HNK, Pravobranilaštva BiH. Ovim obraćanjima su željeli i pravnim putem spriječiti ilegalnu sječu šume i u tome su uspjeli. Federalna uprava za inspeksijske poslove je na zahtjev Pravobranilaštva BiH, Aarhus centra u BiH i Općine Prozor Rama izašla na teren i spriječila dalju degradaciju šume na prostoru Osojnice. Na ovome borba za šume Prozor Rame nije stala, naime pripremljen je i tekst inicijative za usvajanje kantonalnog i federalnog zakona o šumama.



BLOKIRAN LOKALNI PUT PREMA ŠUMI OSOJNICE

Na području općine Prozor-Rama već godinama traje sječa šume koja je bespravna. U odbranu ramskih šuma stala je općina Prozor-Rama, mještani Mjesne zajednice Orašac i Aarhus centar u BiH. Osnovni problem ove nelegalne sječe šume jest ne postojanje Zakona o šumama u Hercegovačko-neretvanskoj županiji što je potvrdilo i samo nadležno kantonalno ministarstvo. U zaštitu šuma uključili su se mještani naselja Proslap koji su blokirali JP Šume Hercegovačko-neretvanske u sječi šume u Osojnici, zajedno sa Aarhus centrom. Put je uspješno blokirano, a preduzeće je odustalo od daljih akcija sječe šume na ovoj lokaciji.





KAMPANJA ZA UOČAVANJE I SPREČAVANJE PROBLEMA U TOKU RADA UREDA ZA RAZMATRANJE ŽALBI BIH

Tokom prvih 3 mjeseca 2023. godine članovi UPTIS-a su radili intenzivno na analizi dokumentacije o radu URŽ-a. Tokom rada na analizi dokumentacije o radu URŽ-a došli su do zabrinjavajućih podataka da Ured za razmatranje žalbi u uredu u Sarajevu kasni u većem broju predmeta koje obrađuje, što su i dokumentovali. Dodatno, kontinuirano se provodila anketa o stepenu zadovoljstva radom URŽ-a, od strane učesnika u postupku javnih nabavki. Rezultati ankete o stepenu povjerenja u rad URŽ-a su trenutno vrlo poražavajući. Na primjer na postavljeno pitanje „Da li smatrate da su rješenja URŽ-a razumljiva i jasna“ čak 55% ispitanih se izjasnilo da smatraju da Rješenja nisu razumljiva.

U ova tri mjeseca održali su tri fokus grupe na kojima su prezentirane aktivnosti koje se rade na projektu i dobili se dodatni inputi od učesnika. Tokom razgovora sa učesnicima na fokus grupama konstatovalo se da je najslabiji dio Sistema javnih nabavki pravna zaštita, a što trenutno potvrđuju i rezultati ankete koji su poražavajući. U ovom periodu se radila i preliminarna analiza sudskih odluka, koja pokazuje vrlo loše rezultate u radu URŽ BiH, te je dio tima UPTIS-a počeo pripremati i koncept prijedloga za poboljšanje pravne zaštite i rada URŽ BIH.

Prema izvještaju o radu URŽ-a za 2019. godinu kasnilo se u rješavanju 21 predmeta, a revizija je utvrdila da se kasnilo u rješavanju 880 predmeta. U 2019. godini procenat žalbi riješenih u roku je 73%, procenat za kašnjenje do 30 dana je 25%, a preko 30 dana 2%.

Tokom analize dostupnih izvještaja konstatovali su da je ukupan trošak iz budžeta na ime lošeg rada URŽ za period 2019. – 2021. iznosio nevjerovatnih 228.847,00 KM. Ovaj iznos pokazuje da URŽ pored toga što provodi pogrešne procese javnih nabavki u BiH, pogrešnim odlukama dodatno opterećuje džepove poreskih obveznika, jer su ovo sve javna sredstva, budžetska sredstva. Pogrešne odluke URŽ-a plaćaju građani svojim novcem.



NE KORUPCIJI U ZAPOSŁJAVANJU

27. februara organizovana je konferencija za medije tokom koje su predstavnici UG „Demos“ javnost upoznali sa problemom korupcije pri zapošljavanju, te načinima borbe protiv korupcije, kao pošasti modernog društva.

„Mi želimo da oduzmemo mogućnost članovima komisije da subjektivno biraju kandidate. Ideja nam je da članovi komisije budu tu više formalno, a da objektivni kriterijumi bude prosjek na fakultetu, socijalno stanje, vrijeme provedeno na Zavodu za zapošljavanje, radni staž. Ne može se desiti da student generacije bude na Zavodu za zapošljavanje, samo zato što nije prošao na konkursu, jer nije član stranke ili nema interesnu grupu iza sebe”, rekao je Božidar Jović, koordinator projekta. Tokom konferencije za medije predstavnici UG “Demos” su pozvali građane da im se pridruže u borbi protiv korupcije.

22. marta 2023. godine u kancelariji UG “Demos“ organizovan je sastanak sa predstavnicima OHR-a, na čelu sa supervizorom za Brčko, gospodinom Jonathan Mennuti. Tokom sastanka predstavnike OHR su upoznali sa problemom korupcije u zapošljavanju te samim projektom, ciljevima i planiranim aktivnostima. Supervizor je podržao aktivnosti koje UG „Demos“ vodi protiv korupcije, izrazivši spremnost da prihvati konkretne zahtjeve UG „Demos“ te da pomoć u borbi protiv korupcije usmjerava po osnovu dostavljenih, konkretnih zahtjeva. 24. marta u Vijećnici, održan je sastanak sa Gradonačelnikom Brčko distrikta, gospodinom Zijadom Nišićem, te poslanikom u Skupštini Brčko distrikta, Abdulahom Iljazovićem. Predstavnici UG “Demos” prisutne su upoznali sa aktivnostima projekta „Ne korupciji u zapošljavanju“ te naglasili obavezu transparentnijeg i objektivnijeg ocjenjivanja kandidata pri zapošljavanju u javnom sektoru Brčko distrikta BiH. Prisutni su se složili sa činjenicom da je ovakav način zapošljavanja neodrživ uz stav da politička svijet mora da sazri kada je u pitanju borba protiv korupcije, te da je neophodna podrška predstavnika svih nivoa vlasti, od sudske, preko zakonodavne do izvršne. 25. marta u centru grada organizovana je ulična akcija u sklopu projekta „Ne korupciji u zapošljavanju“ tokom koje su predstavnici projektnog tima zainteresovanim građanima dijelili informativne materijale te ih lično upoznavali sa projektom, ciljevima, te planiranim aktivnostima.

„Građane smo pokušali ohrabriti da se usude i prijave korupciju, jer to predstavlja prvi korak ka ozdravljenju društva. U materijalima koje smo dijelili predstavljeni su osnovni problemi, tj. ono gdje mi vidimo da je korupcija prisutna kao i ciljevi na osnovu kojih bismo promijenili proces zapošljavanja i odabir kandidata, te proces zapošljavanja učinili transparentnijim i objektivnijim“, rekao je asistent koordinatora Damjan Dundžić.

ANTIKORUPCIJA

Izdvajamo 3 najčitanije vijesti sa portala antikorupcija.info:



» NOVI SKANDAL VLADE FEDERACIJE BIH - BANKA U NJENOM VLASNIŠTVU ONEMOGUĆILA VRŠENJE REVIZIJE A MINISTARSTVO FINANSIJA JE PODRŽALO U KRŠENJU ZAKONA «

Ured za reviziju institucija u Federaciji BiH danas, 07.02., se obratio javnosti saopštenjem u kome navodi da je spriječen u obavljanju svojih zakonskih dužnosti i obaveza, odnosno u vršenju planirane finansijske revizije „Union banke“ d.d. Sarajevo za 2022. godinu, jer mu Uprava ove banke u 97-postotnom vlasništvu Vlade FBiH nije omogućila pristup potrebnoj dokumentaciji.

Nastavak možete pročitati na:
www.antikorupcija.info



» BIVŠI I SADAŠNJI STUDENTI „OSUMNJIČENIH“ VISOKOŠKOLSKIH USTANOVA ZABRINUTI KAKO ĆE SE AKTUELNA AFERA ODRAZITI NA VRIJEDNOST NJIHOVIH DIPLOMA I NASTAVAK STUDIJA «

Dok nadležni za oblast visokog obrazovanja u Republici Srpskoj nevjesto peru ruke od odgovornosti za najveću poslijeratnu aferu u ovoj oblasti, visokoškolske ustanove iz ovog entiteta obuhvaćene akcijom “Klaster” suočavaju se sa opasnošću od uskraćivanja akreditacija, pa i zabranom daljeg rada. S tim u vezi, pojavila se i bojazan njihovih bivših i sadašnjih studenata za status njihovih diploma, odnosno nastavak školovanja.

Nastavak možete pročitati na:
www.antikorupcija.info

» VLADA - POD PRITISKOM STUDENTSKIH AKTIVISTA I AFERE SA NEPRIZNAVANJEM BH. DIPLOMA U SUSJEDSTVU - ODUSTAJE OD SPORNIH IZMJENA ZAKONA O VISOKOM OBRAZOVANJU RS? «

Ministarstvo za naučnotehnološki razvoj, visoko obrazovanje i informaciono društvo Vlade Republike Srpske, na putu je da odustane od novih zakonskih rješenja koja se tiču visokog obrazovanja, a kojim bi se izjednačile akreditovane i neakreditovane visokoškolske ustanove u RS, kada je u pitanju izdavanje diploma. Odnosno, da umjesto spornih izmjena, ostane na rješenjima iz Zakona iz jula 2020. godine, usklađenog sa Okvirnim zakonom o visokom obrazovanju u BiH, po kojem samo akreditovane visokoškolske ustanove, upisane u Državni registar visokoškolskih ustanova u BiH, mogu izdavati javne isprave, tj. diplome.



Nastavak možete pročitati na: www.antikorupcija.info



ODBACITI KRIMINALIZACIJU KLEVETE

Uprkos brojnim upozorenjima i argumentovanim kritikama novinara, organizacija civilnog društva i međunarodne zajednice, vladajući režim usvajanjem Nacrta izmjena i dopuna Krivičnog zakonika RS, uz kršenje procedura kojim se propisuje način pripreme zakona, potvrđuje opasne namjere da stvore zakonske pretpostavke za otvorenu represiju drakonskim kažnjavanjem građana zbog iznesenih stavova i mišljenja.

Ustavom Republike Srpske i postojećim Zakonom o zaštiti od klevete Republike Srpske kleveta je dekriminalizovana, te prema stavovima i rezoluciji Organizacije Ujedinjenih nacija (UN), Savjeta Evrope, Organizacije za evropsku bezbjednost i saradnju (OEBS) i drugih, kleveta u okviru krivičnih zakona predstavlja jednu od deset najvećih prijetnji slobodi izražavanja. Upravo zbog toga bi njeno ponovno uvođenje imalo ozbiljne posljedice na slobodu izražavanja i opštu demokratizaciju društva.

Da je samom najavom izmjena Krivičnog zakonika Republike Srpske već ozbiljno narušen društveni ambijent, potvrđuje činjenica da je prijavljen veliki broj zastrašivanja i napada na imovinu predstavnika medijske zajednice i aktivista. Ove napade najoštrije osuđuju organizacije civilnog društva između ostalih i CCI, TI BiH kao i CRMA, te zahtijevaju od nadležnih institucija da identifikuju i adekvatno sankcionišu sve odgovorne osobe.

Nakon što je stvorena atmosfera linča orkestrirana sa najvišeg vrha izvršne vlasti u kojoj su mete progona bili novinari i aktivisti, usvajanjem nacrta KZ RS, potvrđuje se spremnost da se ide korak dalje u procesu beskrupuloznog i sistematskog gušenja prava i sloboda. Stoga organizacije civilnog društva pozivaju predlagače da povuku predloženo rješenje te napominju da javna rasprava može biti iskorištena samo za povlačenje spornih odredbi jer svaka kriminalizacija klevete predstavlja veliki korak nazad u zaštiti slobode izražavanja.



Reakcija na Nacrt Zakona o posebnom registru i javnosti rada neprofitnih organizacija: Udar na rad udruženja građana

Nacrt Zakona o posebnom registru i javnosti rada neprofitnih organizacija predstavlja diskriminaciju prema udruženjima građana koji se finansiraju od stranih donatora i jasno pokazuje da je namjera vlasti u Republici Srpskoj da ograniče rad organizacijama koje kritikuju njihov rad.

Udruženja građana i građanki uputila su inicijativu Ministarstvu pravde da povuče Nacrt Zakona o posebnom registru i javnosti rada neprofitnih organizacija, naglašavajući u komentarima na sam Nacrt zakona da se on kosi ne samo sa standardima ljudskih prava, Konvencijom za zaštitu ljudskih prava i osnovnih sloboda, Ustavom Bosne i Hercegovine i Ustavom Republike Srpske, nego je u direktnoj suprotnosti sa više važećih zakona u Republici Srpskoj, kao što su Zakon o opštem upravnom postupku, Zakon o upravnim sporovima, Zakon o parničnom postupku, Zakon o udruženjima i fondacijama, Zakon o računovodstvu i reviziji, Zakon o inspekcijama itd. Nadalje, ovaj Nacrt zakona predstavlja nastavak aktivnosti na suzbijanju sloboda izražavanja i udruživanja, koje su započete inicijativom za kriminalizaciju klevete i uvrede, a nastavljene kroz napade na novinare, aktiviste i NVO.



PORTAL PRATIMO TENDERE IDENTIFIKUJE RIZIKE U JAVNIM NABAVKAMA

Portal Pratimo tendere kontinuirano provodi antikorupcijski monitoring javnih nabavki. Tokom perioda januar - mart 2023, monitoring mreža je ispratila 673 postupka, ukupne vrijednosti preko 123 miliona KM, a u 96% slučajeva su identifikovani koruptivni elementi. Planiranje javnih nabavki i dalje je najrizičnija faza, u svakom drugoj praćenoj nabavci otkriveni su elementi diskriminacije i pogodovanja u tenderskoj dokumentaciji, a u čak 78% postupaka otkriveni su rizici u fazi ugovaranja budući da se na tender javlja samo jedan ponuđač. Iako novi Zakon o javnim nabavkama predviđa planiranje i direktnih sporazuma, ova odredba se još uvijek ne sprovodi dosljedno u praksi.

673 PRAĆENA POSTUPKA JAVNE NABAVKE (JN)



NIZAK RIZIK

28 JN

4,16 % JN



SREDNJI RIZIK

262 JN

38,93 % JN



VISOK RIZIK

383 JN

56,90 % JN

122.234.778,44 KM (BEZ PDV-A)

VRIJEDNOST PRAĆENIH POSTUPAKA JAVNIH NABAVKI



NIZAK RIZIK

1.085.039,17 KM

0,90 %



SREDNJI RIZIK

72.673.210,19 KM

59,45 %



VISOK RIZIK

48.476.529,08 KM

39,65 %

Volonteri monitoring mreže na zadatku

“Smatram da je zajednički angažman nas mladih neophodan u što više ovakvih aktivnosti da bismo proširili vidike o trenutnom problemu i stavili tačku na korupciju, jer mi možemo biti ti koji će ovu borbu dovesti do kraja”, poručuje Amina Bašović, jedna od volonterki monitoring mreže portala Prati tendere.

Volonterska mreža daje izuzetan doprinos antikorupcijskom monitoringu javnih nabavki, te pruža mogućnost mladim ljudima da zakorače u svijet građanskog aktivizma i borbe protiv korupcije. U volonterskoj mreži portala Prati tendere do sada je učestvovalo preko 60 mladih ljudi.

VOLONTERI MONITORING MREŽE JAVNIH NABAVKI



PRATIMO TENDERE
Više na: www.pratimotendere.ba

Amina Bašović
Sarajevo, (20)

Smatram da je zajednički angažman nas mladih neophodan u što više ovakvih aktivnosti da bismo proširili vidike o trenutnom problemu i stavili tačku na korupciju, jer mi možemo biti ti koji će ovu borbu dovesti do kraja.



VOLONTERI MONITORING MREŽE JAVNIH NABAVKI



PRATIMO TENDERE
Više na: www.pratimotendere.ba

Mela Rizvo
Sarajevo, (19)

I ranije sam volontirala na različitim projektima. Ističem da je ovo do sada moje najbolje iskustvo, posebno imajući u vidu činjenicu da sam volontirala na vrlo korisnom i društveno prihvatljivom projektu. Korupcija, posebno u javnim nabavkama je veoma štetna i nažalost proširena u našem društvu.



VOLONTERI MONITORING MREŽE JAVNIH NABAVKI



PRATIMO TENDERE
Više na: www.pratimotendere.ba

Svjetlana Sretenović
Istočno Sarajevo, (28)

Zahvaljujem se na ukazanom povjerenju i saradnji. Za vrijeme rada proširila sam vidike u oblasti antikorupcije, stekla nova znanja i prijatelje.



VOLONTERI MONITORING MREŽE JAVNIH NABAVKI



PRATIMO TENDERE
Više na: www.pratimotendere.ba

Riad Zejnilović
Sarajevo, (24)

Korupcija je značajan izazov koji podriva integritet institucija, narušava povjerenje javnosti i guši ekonomski rast. Biti dio tima koji je posvećen rješavanju ovog problema bila je prilika da se pozitivno utječe i doprinese boljoj situaciji u društvu.



Poziv za volontiranje je otvoren za mlade uzrasta 18-30 godina i otvoren je non-stop.
Prijavite se putem e-maila: volonteripratimotendere@gmail.com

Prati tendere, prati svoj novac!

ANTIKORUPTIVNE AKTIVNOSTI TRANSPARENCY INTERNATIONAL BIH

Prezentacija rezultata rada Centra za pružanje besplatne pravne pomoći

Centar za pružanje pravne pomoći Transparency International-a u BiH postupio je tokom 2022. godine u 302 predmeta koja se odnose na slučajeve korupcije i kršenja prava građana, što je za 14% više nego 2021. godine, a primljeno je i preko 1560 poziva građana koji su tražili pravnu pomoć ili savjet. Važno je reći da u 37 pokrenutih slučajeva prijavitelj spadaju u kategoriju “zviždača”, odnosno osoba koje prijavljuju korupciju na radnom mjestu, a najviše ih je iz Federacije BiH koja još nema usvojen Zakon o zaštiti prijavitelja korupcije.

Nakon prijave TI BiH inspekcija zabranila rad ljekarima u Živinicama koji su radili bez dozvole

Kantonalni inspektorat Tuzlanskog kantona, na osnovu prijave Transparency International u BiH (TI BiH), pronašao je četiri ljekara u Živinicama koji su bez dozvole za rad i registrovane djelatnosti pružali pacijentima zdravstvene usluge. Njima je izrečena zabrana rada, a reakcija nadležnih uslijedila je nakon upornog insistiranja TI BiH koji je prvu prijavu u ovom slučaju uputio još u januaru 2022. godine.

CIK nakon prijave TI BiH kaznio gradonačelnika Laktaša

Centralna izborna komisija BiH (CIK) kaznila je gradonačelnika Laktaša Miroslava Bojića zbog zloupotrebe javnih resursa tokom izborne kampanje, jer je napravio stranački skup na otvaranju infrastrukturnih radova koji su finansirani iz gradskog budžeta. Kazna Bojiću koji je bio i kandidat za poslanika u Narodnoj skupštini RS uslijedila je nakon prijave koju je CIK-u poslao Transparency International u BiH zbog otvaranja javnih radova u mjesnoj zajednici Slatina.



TI BiH prijavio devet stranaka zbog primanja donacija od preduzeća koja su dobijala tendere od države

Političke stranke u BiH prijavile su oko 550.000 KM donacija privatnih preduzeća, a devet stranaka primalo je zakonom zabranjene priloge od kompanija koje su dobijale tendere od organa izvršne vlasti. Zbog toga je Transparency International u BiH (TI BiH) uputio prijave Centralnoj izbornoj komisiji protiv SDP BiH, SDA, HDZ BiH, NiP, Stranke za BiH, HRS, Socijaldemokrata BiH, Republičke stranke Srpske i Pokreta za modernu i aktivnu Krajinu.

Revizori CIK-a zaključili: Helikopterski servis RS dao zabranjenu donaciju SNSD-u, jer je o trošku građana vozio Dodika na predizborne skupove

Ured za reviziju Centralne izborne komisije Bosne i Hercegovine zaključio je da je SNSD prekršio Zakon o finansiranju političkih partija, jer je nezakonito primio nenovčanu donaciju od Helikopterskog servisa Republike Srpske koji je o trošku građana vozio tadašnjeg člana Predsjedništva BiH Milorada Dodika na predizborne skupove za Lokalne izbore 2020. godine. Informacije o ovom slučaju CIK-u je podnio Transparency International u BiH na osnovu podataka o letovima helikoptera koji su tada bili javno dostupni. Podaci su pokazali da su se termini polijetanja i slijetanja helikoptera podudarali sa vremenom održavanja skupova SNSD-a, a TI BiH je tada u javnost iznio podatak da je za samo prvih deset dana izborne kampanje helikopter Vlade RS sedam puta letio na predizborne skupove SNSD-a.

TI BiH prijavio devet stranaka zbog primanja donacija od preduzeća koja su dobijala tendere od države

Političke stranke u BiH prijavile su oko 550.000 KM donacija privatnih preduzeća, a devet stranaka primalo je zakonom zabranjene priloge od kompanija koje su dobijale tendere od organa izvršne vlasti. Zbog toga je Transparency International u BiH (TI BiH) uputio prijave Centralnoj izbornoj komisiji protiv SDP BiH, SDA, HDZ BiH, NiP, Stranke za BiH, HRS, Socijaldemokrata BiH, Republičke stranke Srpske i Pokreta za modernu i aktivnu Krajinu.



**TRANSPARENCY
INTERNATIONAL**
Bosna i Hercegovina

JAVNI POZIV

ZA PROJEKTE U BORBI PROTIV KORUPCIJE!

KROZ SVOJ RAD SE BORITE PROTIV KORUPCIJE
U RAZNIM OBLASTIMA, KAO ŠTO SU ZDRAVSTVO,
OBRAZOVANJE, PRAVOSUĐE, ZAŠTITA OKOLIŠA,
JAVNA POTROŠNJA...?

KONKURIŠITE ZA PROJEKAT!

Podržano od:



USAID
OD AMERIČKOG NARODA

KONTINUIRANI JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI BORBE PROTIV KORUPCIJE

Poziv OCD (udruženjima građana i fondacijama) iz BiH da podnesu prijedloge projekata usmjerenih na borbu protiv korupcije, s fokusom na rješavanje konkretnih problema identifikovanih na lokalnom nivou ili zagovaračkih inicijativa usmjerenih ka višim nivoima vlasti.

Od aplikanata se traži da dostave ispunjenu aplikacionu formu, te ostale aplikacijom zahtijevane dokumente i to isključivo putem on-line platforme za apliciranje dostupne na linku:

<http://tender.protivkorupcije.ba/>



Podržano:



USAID
OD AMERIČKOG NARODA

Ova publikacija omogućena je uz podršku američkog naroda putem Američke agencije za međunarodni razvoj (USAID).

Sadržaj ove publikacije je isključiva odgovornost Centara civilnih inicijativa (CCI) i ne mora nužno odražavati stavove USAID-a ili Vlade Sjedinjenih Američkih Država.